

ZACAIRIA

An Chéad Chuid

Filligí ar an Tiarna

1 San ochtú mí den dara bliain de réimeas Dháire labhraíodh briathar an Tiarna leis an bhfáidh Zacairia, mac Bharacia, mhic Ideo, mar a leanas: ²“Bhí fearg mhór ar an Tiarna le bhur n-aithreacha. ³Dá bhrí sin abair leis an bpobal: ‘Mar seo a labhraíonn Tiarna na Slua. Filligí orm, a deir Tiarna na Slua, agus fillfidh mise oraibhse, a deir Tiarna na Slua. ⁴Ná bígí cosúil le bhur n-aithreacha ar thug na fáithe tosaigh foláireamh dóibh, á rá: Mar seo a labhraíonn Tiarna na Slua: Filligí ó bhur ndrochbhealaí agus ó bhur ndrochghníomhartha. Ach níor éist siad liom ná níor thug siad aird ar bith orm, a deir an Tiarna. ⁵Cá bhfuil bhur n-aithreacha anois? Agus na fáithe, an bhfanann siadsan beo i gcónaí? ⁶Ach na rabhaidh agus na reachtanna ar chuir mé a gcúram ar mo sheirbhísigh, na fáithe, nár cuireadh i gcrích ar bhur n-aithreacha iad? Dá thoradh sin rinne siad aithrí agus dúirt siad: Thug Tiarna na Slua íde orainn de dheasca ár mbealaí agus ár ngníomhartha faoi mar a bhí beartaithe aige a dhéanamh.’”



Na hAingil agus na Capaill

⁷Ar an gceathrú lá is fiche den aonú mí déag, is é sin le rá, de mhí Shabát, den dara bliain de réimeas Dháire, labhraíodh briathar an Tiarna le Zacairia, mac Bharraicia, mhic Ideo, mar a leanas: ⁸“Bhí fíis agam san oíche. Is amhlaidh a chonaic mé fear ar mhuin capaill rua agus é ina sheasamh i measc na gcrann miortail a bhí sa ghleann. Taobh thiar de bhí capaill rua agus capaill dhonnrua agus capaill bhána. ⁹‘Cad iad seo, a dhuine uasail?’ arsa mise. ‘Taispeánfaidh mé duit cad iad,’ arsa an t-aingeal a bhí ag caint liom. ¹⁰Ansin chuir an fear a bhí ina sheasamh i measc na gcrann miortail isteach ar an gcomhrá agus dúirt: ‘Is iad seo an dream a chuir an Tiarna amach uaidh chun dul anonn agus anall tríd an domhan.’ ¹¹Thug siadsan an tuairisc seo d’aingeal an Tiarna a bhí ina sheasamh i measc na gcrann miortail, á rá: ‘Táimid tar éis cuairt an domhain a thabhairt agus tá an domhan go léir faoi shuaimhneas agus faoi shíocháin.’ ¹²Dúirt aingeal an Tiarna ansin: ‘A Thiarna na Slua, cá fhad eile a bheidh tú gan trua a ghlacadh do Iarúsailéim agus do chathracha Iúdá, a bhfuil tú i bhfeirg leo le seachtó bliain anuas?’ ¹³D’fhreagair an Tiarna an t-aingeal a bhí ag caint liom le briathra cneasta sólásacha. ¹⁴Mar sin de dúirt an t-aingeal a bhí ag caint liom: ‘Fógair é seo: Mar seo a labhraíonn Tiarna na Slua. Tá teasghrá éadmhar agam do Iarúsailéim agus do Shíón; ¹⁵ach tá fearg an-mhór ar fad orm leis na náisiúin dhíomasacha; mar cé nach raibh ach fearg bheag orm, chuaigh siadsan thar fóir leis an olc a rinne siad. ¹⁶Ar an ábhar sin labhraíonn an Tiarna mar seo: Tá mé tar éis filleadh ar Iarúsailéim le barr trua di. Atógfar mo Theampall inti, a deir Tiarna na Slua, agus sínfear an dorú tomhais thar Iarúsailéim. ¹⁷Fógair é seo freisin: Mar seo a



labhraíonn Tiarna na Slua: Níor tháinig rath go fóill ar mo chathracha, ach tabharfaidh an Tiarna sólas do Shíón athuair agus déanfaidh sé rogha de Iarúsailéim aon uair amháin eile.”

Na hAdharca agus na Gaibhne

2D’ardaigh mé mo shúile agus cad a chonaic mé ach ceithre adharc. ²“Cad iad seo?” arsa mise leis an aingeal a bhí ag caint liom. “Is iad seo na hadharca atá tar éis Iúdá agus Iosrael agus Iarúsailéim a scaipeadh,” ar seisean liom. ³Ansin thaispeáin an Tiarna ceathrar gaibhne dom. ⁴“Cad chuige a bhfuil siad seo ag teacht?” arsa mise. “Tá na hadharca úd tar éis Iúdá a scaipeadh sa chaoi nach bhfuil tógáil a chinn ag duine ar bith,” ar seisean liom, do mo fhreagairt, “ach tá na gaibhne seo tagtha chun scanradh a chur orthu; leagfaidh siad ar lár adharca na náisiún a d’ardaigh a n-adharca os cionn mhuintir Iúdá chun iad a scaipeadh.”

An Fear Tomhais

⁵D’ardaigh mé mo shúile agus chonaic mé fíís eile. Is amhlaidh a bhí fear a raibh dorú tomhais ina lámh aige le feiceáil agam. ⁶“Cá bhfuil tú ag dul?” arsa mise leis. “Chun Iarúsailéim a thomhas,” ar seisean liom, “féachaint cad é a leithead agus a fad.” ⁷Ansin d’fhan an t-aingeal a bhí ag caint liom ina sheasamh agus tháinig aingeal eile chuige ⁸agus dúirt sé leis: “Rith leat agus abair leis an ógánach sin go gcaithfear Iarúsailéim a fhágáil



gan bhallaí mar gheall ar oll-líon na ndaoine agus na mbeithíoch a bheidh inti. ⁹‘Óir beidh mise thart timpeall uirthi mar bhalla tine,’ a deir an Tiarna, ‘agus beidh mé mar ghlóir di ina lár.’”

Dhá Aitheasc do na Deoraithe

- ¹⁰ Hóigh! Hóigh! Teithigí ón tír thuaidh,
a deir an Tiarna,
óir táim tar éis sibhse a scaipeadh
faoi cheithre aird na cruinne, a deir an Tiarna.
- ¹¹ Hóigh!, a Shíón, sábháil thú féin,
tusa a chonaíonn sa Bhablóin;
- ¹² Mar seo a labhraíonn Tiarna na Slua,
an té a chuir uaidh mé tar éis dom a ghlóir a fheiceáil,
i dtaobh na náisiún a rinne slad oraibh:
– óir aon duine a bhaineann libhse,
baineann sé le himreasc a shúile –
- ¹³ Féach, táim ag bagairt mo dhoirn ina n-aghaidh,
agus déanfaidh a gcuid sclábhaithe slad orthu.
Beidh a fhios agaibhse ansin
gurbh é Tiarna na Slua a chuir uaidh mé.



- ¹⁴ Abair amhrán agus déan gairdeas,
a iníon Shíón;
óir, féach, táimse ag teacht
chun cónaí a dhéanamh i do lár, a deir an Tiarna.
- ¹⁵ Ceanglófar a lán náisiún leis an Tiarna an lá sin;
beidh siad ina bpobal aige,
agus cónóidh sé in bhur measc,
agus aithneoidh tú gurbh é Tiarna na Slua
a chuir chugat mé.
- ¹⁶ Ach beidh seilbh ag an Tiarna ar Iúdá,
mar a chomhroinn féin sa talamh naofa,
agus déanfaidh sé rogha de Iarúsailéim athuair.
- ¹⁷ Bíodh gach duine ina thost i láthair an Tiarna;
óir, tá sé ag éirí chun teacht amach as a áitreabh naofa.

Cúisiú agus Cosaint an Ardsagairt Iósua

- 3** Ansin thaispeain sé dom an t-ardsagart Iósua agus é ina sheasamh os comhair aingeal an Tiarna. Bhí an tÁibhirseoir ina sheasamh ar a lámh dheas chun é a chúiseamh.
- ² Dúirt aingeal an Tiarna leis an Áibhirseoir: “Go dtuga an Tiarna achasán duit, a Áibhirseoir! Go dtuga an Tiarna, a rinne rogha de Iarúsailéim, achasán duit! Nach aibhleog a sciobadh ón tine an fear seo?” ³ Is amhlaidh a bhí Iósua gléasta in éadaí salacha



agus é ina sheasamh os comhair an aingil. ⁴Thug an t-aingeal an t-ordú seo a leanas dá lucht freastail: “Bainigí na héadaí salacha de.” Dúirt sé le Iósua ansin: “Féach, conas mar atá mé tar éis do chuid urchóide a thógáil díot agus gléasfaidh mé thú in éadaí taibhseacha.” ⁵“Cuirigí ceannbheart glan ar a cheann,” ar seisean ansin. Chuir siad an ceannbheart glan ar a cheann agus ghléas siad é sna héadaí. Lena linn sin bhí aingeal an Tiarna ina sheasamh in aice láimhe. ⁶Thug aingeal an Tiarna an dearbhú seo a leanas do Iósua ansin: ⁷“Mar seo a labhraíonn Tiarna na Slua: ‘Má shiúlann tú de réir mo bhealaí, agus m’aitheanta a choimeád, is tusa a riarfaidh mo Theampall agus a chosnóidh mo chúirteanna, agus tabharfaidh mé cead duit caidreamh a dhéanamh leo siúd atá ina seasamh anseo. ⁸Éist, mar sin, a Iósua, a ardsagairt – tú féin agus do chompánaigh atá ina suí os do chomhair – óir, is fir dhea-thuair sibh. Is amhlaidh atáimse chun tabhairt ar mo sheirbhíseach, an Beangán, teacht. ⁹Seo í an chloch atáimse a chur ar Iósua; tá seacht ngrua ar an aon chloch amháin seo agus greanfaidh mé féin an inscríbhinn uirthi, a deir Tiarna na Slua, agus glanfaidh mé urchóid na tíre seo di in aon lá amháin. ¹⁰An lá sin, a deir Tiarna na Slua, tabharfaidh gach duine agaibh cuireadh dá chomharsa teacht agus suí síos faoina fhíniúin agus faoina chrann fíí féin.”

An Crann Solais agus an Dá Ológ

4 D’fhill an t-aingeal a bhí ag caint liom agus dhúisigh sé mé mar a dhúisítear duine as a chodladh. ²“Cad é a fheiceann tú?” ar seisean liom. “Is é rud a fheicim,” arsa mise, “ná crann solais agus é déanta go hiomlán d’ór agus babhla ar a bharr. Tá seacht lampa



air agus seacht ngob ar gach ceann díobh. ³In aice leis tá dhá chrann ológ, ceann amháin ar an taobh deas de agus ceann eile ar an taobh clé.” ⁴Labhair mé ansin leis an aingeal a bhí ag caint liom, á cheistiú: “Cad iad seo, a dhuine uasail?” ⁵Mar fhreagra air sin dúirt an t-aingeal a bhí ag caint liom: “Nach bhfuil a fhios agat cad iad seo?” “Níl ná a fhios, a dhuine uasail,” arsa mise leis. ^{6a}Dúirt sé liom ansin, do mo fhreagairt: ^{10b}“Is iad na seacht lampa seo súile an Tiarna a bhíonn ag breathnú uathu amach ar fud an domhain uile.” ¹¹Labhair mé leis arís, á rá: “Cad é an chiall atá leis an dá chrann ológ seo a bhfuil ceann díobh ar dheis an chrainn solais agus an ceann eile ar a chlé.” ¹²Labhair mé leis aon uair amháin eile agus dúirt: “Cad iad an dá chraobh olóige seo a dhoirteann an ola tríd an dá pháopa óir?” ¹³“Nach bhfuil a fhios agat cad iad seo?” ar seisean liom. “Níl ná a fhios, a dhuine uasail,” arsa mise. ¹⁴Dúirt sé ansin: “Is iad seo an bheirt unghach a bhíonn ina seasamh os comhair Tiarna an domhain uile.”

Zarubáibil agus Atógáil an Teampaill

^{6b}Seo é briathar an Tiarna i dtaobh Zarubáibil: “Ní le treise arm ná le teann fornirt a dhéanfar é ach le cuidiú mo spioraid féin, a deir Tiarna na Slua. ⁷Céard é thusa, a shliabh mhóir? Déanfar má díot roimh Zarubáibil. Nuair a bhéarfaidh sé an chloch chinn amach, gáirfear os ard: “Nach álainn í! Nach álainn í.” ⁸Labhraíodh briathar an Tiarna liom mar a leanas: ⁹“Is iad lámha Zarubáibil a leag bunsraith an Teampaill seo, agus is iad a lámhasan freisin a thabharfaidh chun dea-chríche é. Agus beidh a fhios agat gurb é Tiarna



na Slua a chuir chugaibh mé.¹⁰ Óir, duine ar bith a chaith drochmheas ar an lá seo na mioneachtraí cuirfear áthas air agus feicfidh sé an chloch thofa i lámha Zarubáibil.”

An Scrolla Eitilte

5 D’ardaigh mé mo shúile arís agus cad a chonaic mé ach scrolla ag eitilt.² “Cad é a fheiceann tú?” ar seisean liom. “Feicim scrolla ar eitilt,” arsa mise, “tá sé fiche banlámh ar fad agus deich mbanlámh ar leithead.”³ Dúirt sé liom ansin: “Is é seo an mhallacht atá ag gabháil amach thar aghaidh na tíre. Óir, de réir taobh amháin de, díbreofar gach duine a dhéanann goid; agus de réir an taoibh eile de, díbreofar as an áit seo gach duine a thugann mionn éithigh dar m’ainmse.”⁴ Scaoilfidh mé an mhallacht seo uaim amach, a deir Tiarna na Slua, agus rachaidh sí isteach i dteach an ghadaí agus i dteach an duine a thugann mionn éithigh dar m’ainmse. Fanfaidh sí i lár a thí agus scriosfaidh sí é idir adhmaid agus chlocha.”

Bairille an Oilc

⁵Thaispeáin an t-aingeal a bhí ag caint liom é féin dom ansin agus dúirt: “Ardaigh do shúile agus féach ar an rud seo atá ag nochtadh chugainn amach.”⁶ “Cad é seo?” arsa mise. “Bairille is ea an rud seo atá ag nochtadh chugainn,” ar seisean. Ansin dúirt sé: “Is é seo [an t-olc] atá siad a dhéanamh ar fud na tíre uile.”⁷ Ardaíodh an clúdach luaidhe den bhairille ansin agus bhí bean ina suí istigh ann.⁸ “Is í seo an Urchóid,” ar seisean agus



sháigh sé síos sa bhairille í agus theann sé an clúdach luaidhe ar a bhéal. ⁹D'ardaigh mé mo shúile ansin agus cad a chonaic mé ach beirt bhan ag nochtadh chugainn agus an ghaoth ag séideadh faoina sciatháin – óir, is amhlaidh a bhí sciatháin acu cosúil le sciatháin na coirre báine. Thóg siad an bairille suas idir an talamh agus an spéir. ¹⁰“Cá bhfuil an bairille á thabhairt acu?” arsa mise leis an aingeal a bhí ag caint liom. ¹¹“Go dtí tír na Sionáire,” ar seisean liom, “chun teampall a thógáil dó ann. Nuair a bheidh sé ullamh dó, cuirfear síos ar a bhonn féin é.”

Na Carbad

6D'ardaigh mé mo shúile arís agus cad a chonaic mé ach ceithre charbad ag nochtadh chugainn amach idir dhá shliabh. Sléibhte cré-umhaí ba ea na sléibhte seo. ²Bhí capaill rua faoin gcéad charbad, agus capaill dhubha faoin dara ceann, ³agus capaill bhána faoin tríú ceann, agus capaill bhallacha láidre faoin gceathrú ceann. ⁴Cheistigh mé an t-aingeal a bhí ag caint liom, á rá: “Cad iad seo, a dhuine uasail?” ⁵Dúirt an t-aingeal liom ansin, do mo fhreagairt: “Tá siad seo ag gabháil amach faoi cheithre hairde na cruinne tar éis dóibh a bheith ag freastal ar Thiarna an domhain uile. ⁶Tá carbad na gcapall dubh ag dul go dtí an tuaisceart agus carbad na gcapall bán ag dul go dtí an t-iarthar agus carbad na gcapall ballach ag dul go dtí an deisceart.” ⁷Tháinig siad amach go beo bríomhar agus flosc orthu chun dul anonn agus anall ar fud an domhain mhóir. “As go brách libh as seo anonn agus anall ar fud an domhain,” arsa an t-aingeal agus d’imigh siad leo ar chuairt na cruinne. ⁸Ghlaoigh sé ormsa ansin agus labhair sé liom mar a leanas: “Féach,” ar seisean, “na cinn



atá ag dul i dtreo an tuaiscirt tabharfaidh siad ar spiorad [an Tiarna] tuirling ar an tuaisceart. ¹⁵Tiocfaidh daoine atá i bhfad ar shiúl agus atógfaidh siad Teampall an Tiarna. Agus beidh a fhios agaibh gurbh é Tiarna na Slua a chuir chugaibh mé. Titfidh sé seo amach má éisteann sibh go haireach le guth an Tiarna bhur nDia.”

An Choróin

⁹Labhraíodh briathar an Tiarna liom mar a leanas: ¹⁰“Glac ofrála ó na hiarchimí Haldae agus Tóibíá agus Iadáia agus imigh leat an lá céanna go dtí teach Ióisíá, mac Zafainíá – is amhlaidh a bhí na daoine seo tar éis teacht ón mBablóin. ¹¹Tóg airgead agus ór agus déan coróin agus cuir ar cheann an ardsagairt Iósua, mac Iózádác, í ¹²agus abair é seo leis: Mar seo a labhraíonn Tiarna na Slua: Seo fear darb ainm ‘An Beangán’; eascróidh sé mar a bhfuil sé agus tógfaidh sé Teampall an Tiarna. ¹³Is eisean go deimhin a atógfaidh Teampall an Tiarna, agus a chuirfidh air féin na suaitheantais ríoga, agus a shuífidh mar rialtóir ina ríchathaoir. Beidh sagart ar a dheis agus beidh comharaíocht chairdiúil eatarthu. ¹⁴Cuirfear an choróin i dTeampall an Tiarna mar thoirbhirt chuimhneacháin ar Haldae agus ar Thóibíá agus ar Iadáia agus ar Ióisíá, mac Zafainíá.”

Troscadh agus Fíorchráifeacht

7Sa cheathrú bliain de réimeas Dháire rí, ar an gceathrú lá den naoú mí, is é sin le rá, de mhí Chisléu, labhraíodh briathar an Tiarna le Zacairia. ²Is amhlaidh a chuir muintir



Bhéit Éil feidhmeannach de chuid an rí darb ainm Searaizir uathu, i dteannta a chuid fear, chun fabhar a impí ar an Tiarna,³ agus chun an cheist seo a chur ar shagairt Theampall Thiarna na Slua agus ar na fáithe: “An gcaithfidh mé caoineadh agus troscadh a dhéanamh go fóill sa chúigiú mí faoi mar atá á dhéanamh agam leis an oiread sin blianta anuas?”

⁴Labhraíodh briathar Thiarna na Slua liom ansin mar a leanas: ⁵“Abair é seo le muintir uile na tíre agus leis na sagairt: ‘Nuair a dhéanadh sibh troscadh agus caoineadh sa chúigiú agus sa seachtú mí le seachtó bliain anuas, an ar mo shonsa a dhéanadh sibh é?’

⁶Agus nuair a d’itheadh agus a d’óladh sibh nach ar bhur son féin a dhéanadh sibh ithe agus ól? ⁷Nár bh iad seo na briathra a d’fhógair an Tiarna trí bhéal na bhfáithe tosaigh, nuair a bhí daoine ina gcónaí faoi rath in Iarúsailéim, agus sna bailte atá ina timpeall agus sa Neigib agus sna hÍsleáin freisin?”

⁸Labhraíodh briathar an Tiarna ansin le Zacairia mar a leanas: ⁹“Mar seo a labhraíonn Tiarna na Slua: “Tugaigí fíorbhreithiúnas uaibh; taispeánadh gach duine agaibh buanghrá agus trua dá bhráthair. ¹⁰Ná déanaigí foréigean ar an mbaintreach ná ar an dílleachta, ar an gcoimhthíoch ná ar an mbochtán; ná bíodh aon duine agaibh ag meabhrú oilc ina chroí in aghaidh a bhráthar.”

¹¹Ach dhiúltaigh siad éisteacht liom agus d’iompaigh siad gualainn stailceach chugam agus thug siad cluas bhodhar dom ar eagla go gcloisfidís. ¹²Rinne siad a gcroíthe chomh dáigh le diamant ar eagla go gcloisfidís an teagasc, agus an teachtaireacht a chuir Tiarna na Slua chucu lena spiorad trí bhéal na bhfáithe a bhí ann fadó. Dá dheasca sin chuir Tiarna na Slua smachtú dian orthu le neart feirge. ¹³Seo mar a tharla sé, a deir Tiarna na



Slua: “Nuair a ghlaoigh mise orthu, níor éist siad liom; mar an gcéanna, nuair a ghlaoigh siadsan ormsa, níor éist mise leo. ¹⁴ Ach scaip mé chun fáin iad i measc na náisiún uile nach raibh aithne acu orthu; agus tar éis dóibh imeacht bánaíodh an tír sa chaoi nach raibh duine ná deoraí ag gabháil anonn agus anall inti. Ar an gcuma sin rinne siad fásach folamh dá ndúiche álainn.”

Oracail Mheisiasacha

8 Labhraíodh briathar Thiarna na Slua liom mar a leanas:

² Mar seo a labhraíonn Tiarna na Slua:

“Tá teasghrá éadmhar agam do Shíón,
a mhúsclaíonn tocht díograise ionam di.”

³ Mar seo a labhraíonn Tiarna na Slua:

“Fillfidh mé ar Shíón
agus déanfaidh mé cónaí i lár Iarúsailéim.
Glaofar an Chathair Dhílis ar Iarúsailéim,
Sliabh Thiarna na Slua, an Sliabh Naofa.”

⁴ Mar seo a labhraíonn Tiarna na Slua:

“Beidh seanfhir agus seanmhná ina suí arís
i gcearnóga Iarúsailéim;
beidh bata ag gach duine díobh ina láimh



de dheasca a sheanaoise.

⁵ Agus beidh cearnóga na cathrach
lán de bhuaichailí agus de chailíní
agus iad ag súgradh iontu.”

⁶ Mar seo a labhraíonn Tiarna na Slua:
“Más geall le míorúilt é seo
le hiarmhar an phobail seo sna laethanta sin,
an gá gurb ionadh liomsa é?”
– a deir Tiarna na Slua.

⁷ Mar seo a labhraíonn Tiarna na Slua:
“Sábhálfaidh mé mo phobal
ón domhan thoir agus ón domhan thiar.

⁸ Tabharfaidh mé ar ais iad
chun cónaí a dhéanamh in Iarúsailéim.
Beidh siad ina bpobal agamsa
agus beidh mise i mo Dhia acusan
go dílis agus go cóir.”

⁹ Mar seo a labhraíonn Tiarna na Slua:
“Músclaíge bhur misneach,
sibhse atá ag éisteacht sna laethanta seo
leis na briathra seo ó bhéal na bhfáithe



atá ag déanamh tairngreachta,
 ón lá ar leagadh bunsraith theach Thiarna na Slua,
 ionas go n-atógfaí an Teampall.

¹⁰ Óir, roimh na laethanta seo
 ní raibh luach saothair le fáil ag fear nó ag ainmhí,
 agus, mar gheall ar a chuid naimhde,
 ní raibh sábháilteacht ar bith ann do dhuine
 agus é ag dul i mbun a ghnó;
 mar bhí mé tar éis an uile dhuine
 a chur in aghaidh a chomharsan.

¹¹ Ach anois ní chaithfidh mé
 le hiarmhar an phobail seo
 faoi mar a chaith mé leo tráth,”
 a deir Tiarna na Slua.

¹² “Beidh rath agus bláth ar a síol;
 tabharfaidh an fhíniúin a caora
 agus an talamh a thorthaí;
 fearfaidh na spéartha a ndrúcht,
 agus cuirfidh mé iarmhar an phobail seo
 i seilbh na maitheasaí seo go léir.

¹³ Faoi mar ba mhallacht sibh tráth i measc na náisiún,
 a theaghlaigh Iúdá agus a theaghlaigh Iosrael,



sin mar a shábhálfaidh mé sibh
 nó go mbeidh sibh in bhur n-ábhar beannachtaí dóibh;
 ná bíodh aon eagla oraibh mar sin
 ach músclaíгі bhur misneach.”

¹⁴ Mar seo a labhraíonn Tiarna na Slua:
 “Faoi mar a bheartaigh mé
 dochar a dhéanamh daoibh
 nuair a chuir bhur n-aithreacha fearg orm,”
 a deir Tiarna na Slua,
 “agus nár tháinig aithreachas ar bith orm faoi,

¹⁵ sin mar atá sé beartaithe agam athuair
 rath a chur ar Iarúsailéim
 agus ar theaghlach Iúdá sna laethanta seo.
 Ná bíodh eagla oraibh.

¹⁶ Is iad seo na haitheanta atá le comhlíonadh agaibh:
 labhraíodh gach duine an fhírinne lena chomharsa;
 ag bhur ngeataí tugaigí fíorbhreithiúnais,
 a bhuanóidh an tsíocháin eadraibh;

¹⁷ ná beartaíodh aon duine agaibh
 olc ina chroí in aghaidh a chomharsan;
 agus ná bígí tugtha do mhionnaí bréige;



óir, is fuath liom na nithe sin go léir,”
a deir an Tiarna.

¹⁸ Labhraíodh briathar an Tiarna liom mar a leanas:

¹⁹ Mar seo a labhraíonn Tiarna na Slua:
“Beidh troscadh an ceathrú agus an cúigiú
agus an seachtú agus an deichiú mí
ina n-ábhar áthais agus lúcháire
agus ina bhféilte aoibhnis do theaghlach Iúdá.
Dá bhrí sin, gráigí an fhírinne agus an tsíocháin.”

²⁰ Mar seo a labhraíonn Tiarna na Slua:
“Tiocfaidh ciníocha eile fós, áitritheoirí cathracha móra.

²¹ Agus rachaidh áitritheoirí cathrach amháin
go ceann eile, á rá: ‘Téimis láithreach
chun impí a dhéanamh ar an Tiarna
agus chun Tiarna na Slua a lorg.
Táimse féin ag dul.’

²² Tiocfaidh mórán ciníocha agus náisiún tréan
chun Tiarna na Slua a lorg in Iarúsailéim
agus chun impí a dhéanamh ar an Tiarna.”

²³ Mar seo a labhraíonn Tiarna na Slua:
“Sna laethanta sin béarfaidh deichniúr fear



as gach náisiún a bhfuil a theanga féin aige,
greim ar chiumhais róba gach Giúdaigh, á rá:
‘Lig dúinn dul in éineacht leat.
óir chualamar go bhfuil Dia in bhur dteannta.’”

An Dara Cuid

Ionradh an Tiarna

9Oracal.

Tá briathar an Tiarna i ndúiche Hadrác,
agus tá foslongfort aige sa Damaisc,
– mar is leis an Tiarna cathracha uile Arám
faoi mar is leis treibheanna uile Iosrael.

²Tá sé i Hamát freisin, áit atá ar a teorainn
agus sa Tuír agus i Síodón, dá mhéad í a n-eagna.

³Tá an Tuír tar éis daingean a thógáil di féin,
agus airgead a charnadh mar dheannach,
agus ór a chnuasach mar lathach na sráideanna.

⁴Ach, féach! Gabhfaidh an Tiarna seilbh uirthi;
brisfidh sé a cumhacht ar an bhfarraige



agus loiscfear í le tine.

⁵ Feicfidh Aiscileon é sin agus tiocfaidh eagla uirthi;
feicfidh Gazá é chomh maith
agus beidh sí ag lúbarnaíl le scéin;
beidh Eacrón ar crith freisin,
mar cuirfear a dóchas ó chrích.

Díothófar rí Ghazá

agus ní dhéanfar cónaí in Aiscileon feasta.

⁶ Lonnóidh pór measctha in Aisdeod,
agus buailfidh mé an t-uabhar as an bhFilistíneach.

⁷ Sracfaidh mé óna bhéal
an fheoil a bhfuil an fhuil inti fós,
agus sciobfaidh mé a ofrálacha gráinniúla
ó idir a fhiacra.

Lena chois sin déanfar iarmhar dár nDia de,
agus beidh sé ina chlann in Iúdá;
agus beidh Eacrón cosúil le Iabúsach.

⁸ Suífidh mé mo champa mórtimpeall mo thí,
mar gharda in aghaidh a dtiocfaidh agus a n-imeoidh;
ní ghluaisfidh aon tíoránach tríothu feasta,
mar táimse tar éis bheith ag faire orthu anois le mo shúile cinn féin.



Teacht an Rí Mheisiaisaigh

- ⁹ Déan gairdeas go spleodrach, a iníon Shíón;
 tóg gártha áthais, a iníon Iarúsailéim.
 Féach, tá do rí ag teacht chugat,
 é go caithréimeach slán,
 agus go ceansa,
 agus ag marcaíocht ar asal,
 ar bhromaichín, ar shearrach asail.
- ¹⁰ Scuabfaidh sé an carbad chun siúil as Eafráim
 agus an capall catha as Iarúsailéim;
 agus brisfear an bogha cogaidh.
 Labhróidh sé leis na náisiúin faoin tsíocháin,
 agus beidh sé i réim ó mhuir go muir
 agus ón Abhainn go himill na cruinne.

Beidh Iosrael faoi Rath

- ¹¹ Ach maidir leatsa,
 ar son fhuil do chonartha liomsa,
 seolfaidh mé do chimí ar ais ón bpoll
 nach bhfuil aon uisce ann.



- ¹² Filligí ar an daingean, a chimí an dóchais,
an lá inniu féin dearbhaím
go ndéanfaidh mé cúiteamh libh faoi dhó.
- ¹³ Óir, táim tar éis Iúdá a lúbadh dom féin mar bhogha,
agus an bogha sin a ghléasadh le hEafráim mar shaighead.
Beartóidh mé do chlann mhac, a Shíón, mar airm
in aghaidh chlann mhac Iáván,
agus déanfaidh mé claíomh gaiscígh díot.
- ¹⁴ Nochtfaidh an Tiarna os a gcionn.
Seinnfidh a shaighead amach mar splanc thintrí;
séidfidh an Tiarna Dia an stoc,
agus réabfaidh sé leis ar aghaidh
ar stoirmeacha an deiscirt.
- ¹⁵ Cosnóidh Tiarna na Slua iad;
díisceoidh siad [a naimhde]
agus gabhfaidh siad de chosa sna clocha tabhail.
Ólfaidh siad agus tógfaidh siad racán,
faoi mar a bheadh siad ar meisce le fíon;
beidh siad chomh lán le babhla íobartha
chomh smeartha le cúinní altóra.
- ¹⁶ An lá sin, sábhálfaidh an Tiarna, a nDia, iad,
a phobal féin, mar thréad caorach.



Óir beidh siad ag drithliú ar a thalamh
amhail seoda corónach.

¹⁷Nach maith an bhail a bheidh orthu go deimhin!
Nach álainn a bheidh siad!
Cuirfidh arbhar bláth ar na hógánaigh
agus cuirfidh fíon nua maise ar na maighdeana.

Is é an Tiarna Tobar gach Maitheasa

10Iarraigí fearthainn ar an Tiarna
i séasúr fhearthainn an earraigh;
óir, is é an Tiarna a dhéanann na néalta doininne.
Tabharfaidh sé ceathanna báistí daoibh
agus cuirfidh sé féar ag fás
i bpáirc an uile dhuine.

²Óir, rinne na híola tí tairngreachtaí éithigh,
agus chonaic an lucht fáistine físeanna falsa;
bíonn na taibhrimh ag réamhfhógairt na baoise
agus ag tabhairt sóláis bhréige.
Dá dheasca sin uile, táthar imithe chun fáin mar thréad caorach
agus iad á gcrá cheal aoire.



Near tófar Iúdá agus Eafráim Arís

- ³ Tá mo chuid feirge ar lasadh
in aghaidh na n-aoirí
agus cuirfidh mé pionós ar na treoraithe.
Ach tabharfaidh Tiarna na Slua cuairt
ar a thréad, ar theaghlach Iúdá,
agus déanfaidh sé capall maorga cogaidh de.
- ⁴ Is uaidh a thiocfaidh
an chloch chúinne agus an pionna botha,
an bogha cogaidh agus gach ceannasaí.
- ⁵ I dteannta a chéile beidh siad mar laochra
a shatlaíonn ar lathach na sráideanna sa chath.
Fearfaidh siad cogadh, mar tá an Tiarna leo,
agus an dream a bhíonn ag marcaíocht ar chapaill,
cuirfear raon maidhme orthu.
- ⁶ Neartóidh mé teaghlach Iúdá
agus sábhálfaidh mé teaghlach Iósaef.
Seolfaidh mé ar ais arís iad,
mar táim tar éis trua a ghlacadh dóibh,
agus beidh siad amhail is nár shéan mé riamh iad;
óir, is mise an Tiarna, a nDia, agus éistfidh mé lena nguí.



- ⁷ Beidh muintir Eafraím ina ngaiscígh,
agus cuirfear áthas ar a gcroí faoi mar a bheidís ag ól fíona.
Feicfidh a gclann mhac é seo
agus beidh lúcháir orthu mar gheall air
agus déanfáidh a gcroíthe gairdeas sa Tiarna.
- ⁸ Ligfidh mé fead orthu
agus cruinneoidh mé iad le chéile;
óir, táim tar éis iad a fhuascailt.
Agus beidh siad chomh líonmhar
agus a bhí siad riamh.
- ⁹ Cuirfidh mé mar shíol iad i measc na náisiún;
ach cuimhneoidh siad orm
i dtíortha atá i bhfad i gcéin.
Tógfaidh siad a gclann iontu
agus fillfidh siadsan ar ais.
- ¹⁰ Tabharfaidh mé abhaile ón Éigipt iad
agus cruinneoidh mé iad ón Asaír.
Seolfaidh mé isteach i nGileád agus sa Liobáin iad,
agus fiú amháin ansin ní bhfaighfear slí go leor dóibh.
- ¹¹ Gabhfaidh siad trí mhuir na hÉigipte
agus buailfidh an Tiarna tonnta na farraige dóibh
agus rachaidh an Níl ar fad i ndísc.



Buailfear an t-uabhar as an Asaír
agus tógfar an ríshlat ón Éigipt.

¹² Neartóidh mé sa Tiarna iad
agus gluaisfidh siad ar aghaidh ina ainm,
a deir an Tiarna.

Na Cumhachtaí Móra

1 1 Oscail do gheataí, a Liobáin,
chun go loiscfidh an tine do chéadrais.

² Déan olagón, a chufróg;
óir, tá an céadras tar éis titim,
agus tá na mórchumhachtaí basctha.
Déan olagón, a dharacha Bháiseán;
óir, tá an fhoraois dhíbhealaigh leagtha ar lár.

³ Éist le holagón na n-aoirí;
óir, tá a dtalamh méith féaraigh millte.
Éist le búiríl na leon óg;
óir tá mothair dhlútha na hIordáine scriosta.



Fáthscéal na nAoirí

⁴Mar seo a labhair an Tiarna, mo Dhia: “Beathaigh an tréad atá le marú.” ⁵Óir, maraíonn a gceannaitheoirí iad agus ní aithníonn siad go bhfuil siad ciontach; agus deir a ndíoltóirí: “Céad moladh leis an Tiarna, mar táimse tar éis éirí saibhir.” Is amhlaidh nach bhfuil aon trua ag a n-aoirí dóibh. ⁶Óir, ní bheidh trua agam d’áitritheoirí na tíre níos mó, a deir an Tiarna. Cuirfidh mé gach uile dhuine acu faoi smacht a aoire, faoi smacht a rí; creachfaidh siad an tír agus ní fhuasclóidh mé óna smacht iad.

⁷Mar sin de, rinneadh aoire díom ar an tréad a bhí le marú ag na trádálaithe caorach. Ansin thóg mé dhá bhachall; “Cineáltas” a thug mé mar ainm ar cheann acu agus “Aontacht” ar an gceann eile agus thosaigh mé ar an tréad a bheathú. ⁸In aon mhí amháin chuir mé an triúr aoire dá gcois. Ach bhí briste ar an bhfoighne agam leis an tréad agus ba ghráin leosan mise chomh maith. ⁹“Ní bheathóidh mé sibh níos mó,” arsa mise. “Cibé agaibh atá le bás a fháil, faighidís bás; díothaítear a bhfuil le díothú agus itheadh an fuilleach feoil a chéile.” ¹⁰Thóg mé mo bhachall “Cineáltas” agus bhris mé ina dhá leath í chun an conradh a bhí déanta ag an Tiarna leis na náisiúin go léir a chur ar ceal. ¹¹Agus cuireadh ar ceal an lá sin é agus thuig na trádálaithe caorach a bhí ag féachaint orm gur bh é sin briathar an Tiarna. ¹²Dúirt mé leo ansin: “Más maith libh é, tugaigí mo thuarastal dom; ach mura maith, ná bacaigí leis mar scéal.” Agus chomhair siad mo thuarastal amach dom, tríocha píosa d’airgead geal. ¹³“Caith isteach i gciste an Teampaill é,” arsa an Tiarna liom, “an luach móruasal seo, mar dhea, a chuir siad orm.” Ansin thóg mé an tríocha píosa d’airgead geal agus chaith mé isteach sa chiste iad atá i dteach an Tiarna.



¹⁴Ina dhiaidh sin bhris mé an dara bachall, “Aontacht”, ina dhá leath chun an bráithreachas a bhí idir Iúdá agus Iosrael a bhriseadh.

¹⁵Dúirt an Tiarna liom ansin: “Faigh trealamh aoire gan chiall duit féin athuair. ¹⁶Mar is amhlaidh atáim chun aoire a cheapadh sa tír; ní bheidh sé buartha faoina mbeidh i mbaol a gcaillte; ní chuardóidh sé a mbeidh ag dul ar seachrán; ní leigheasfaidh sé a mbeidh gonta agus ní chothóidh sé a mbeidh slán folláin go fóill. Ach íosfaidh sé feoil na mbeithíoch biata agus bainfidh sé spólaí díobh.

¹⁷Mairg don aoire gan éifeacht,
a thréigeann a thréad!
Go mbuaile an claíomh a ghéag
agus a shúil dheas chomh maith.
Go searga a ghéag ar fad
agus go mbaintear an radharc
dá shúil dheas go hiomlán.”

Bua na nGiúdach ar a Naimhde

12^{Oracal.}

Briathar an Tiarna i dtaobh Iosrael. Is é seo a deir an Tiarna, an té a shín amach na flathis agus a leag bunsraith na cruinne agus a chruthaigh spiorad an duine istigh ann:

²“Féach! Déanfaidh mé corn meisiciúil de Iarúsailéim i gcomhair náisiúin uile na



comharsanachta; agus ní taise do Iúdá é nuair a chuirfear Iarúsailéim faoi léigear. ³Ar an lá sin, déanfaidh mé cloch thógála de Iarúsailéim do na náisiúin go léir; na daoine a thugann iarracht ar í a thógáil suas, gortóidh siad iad féin go mór, agus cruinneoidh náisiúin uile an domhain ina haghaidh.

⁴“Ar an lá sin, a deir an Tiarna, cuirfidh mé alltacht ar gach uile chapall agus deargbhuile ar na marcaigh. Ach féachfaidh mé anuas le taitneamh ar theaghlach Iúdá nuair a chuirfidh mé daille ar chapail uile na náisiúin eile. ⁵Déarfaidh clann Iúdá ina gcroíthe ansin: ‘Údar nirt d’áitritheoirí Iarúsailéim is ea Tiarna na Slua, a nDia.’ ⁶Ar an lá sin, déanfaidh mé ciseán tine i lár coille agus tóirse lasrach i measc punann de chlanna Iúdá; loiscfidh siad náisiúin uile na comharsanachta ar dheis agus ar chlé. Ach beidh Iarúsailéim á háitriú agus í suite go daingean ina hionad féin i gcónaí.

⁷“Sábhálfaidh an Tiarna bothanna Iúdá ar dtús i dtreo nach sáróidh glóir theaghlach Dháiví agus áitritheoirí Iarúsailéim glóir Iúdá. ⁸Ar an lá sin, cosnóidh an Tiarna áitritheoirí Iarúsailéim agus ar an lá sin freisin beidh an duine is laige díobh cosúil le Dáiví agus beidh teaghlach Dháiví féin cosúil le Dia, cosúil le haingeal an Tiarna, ar a dtosach.

⁹“Ar an lá sin, tá sé beartaithe agam na náisiúin uile a thiocfaidh in aghaidh Iarúsailéim a dhísciú.

Aithrí, Caoineadh, Naomhú na nGiúdach

¹⁰“Agus doirtfidh mé spiorad an ghrásta agus na hachainí ar theaghlach Dháiví agus ar áitritheoirí Iarúsailéim i dtreo go mbreathnóidh siad ormsa, ar an té a tholl siad.



Caoinfidh siad é mar a chaoinfeá aonmhac; goilfidh siad go géar goirt ina dhiaidh faoi mar a dhéanfaí gol i ndiaidh na céadghine. ¹¹Ar an lá sin, déanfar caoineadh mór in Iarúsailéim cosúil leis an gcaoineadh a dhéantar ar son Hadad Rimeon ar mhá Mhigideo.

¹² Agus déanfaidh an tír caoineadh,
gach teaghlach ar leith:
muintir theaghlach Dháiví ar leith,
agus a mná leo féin;
muintir theaghlach Nátán ar leith,
agus a mná leo féin;

¹³ muintir theaghlach Léiví ar leith,
agus a mná leo féin;
teaghlach Shimeí ar leith,
agus a mná leo féin;

¹⁴ na teaghlaigh eile go léir,
gach teaghlach ar leith,
agus a mná leo féin.

13 “Ar an lá sin, osclófar tobar do theaghlach Dháiví agus d’áitritheoirí Iarúsailéim chun an peaca agus an bréantas a ghlanadh díobh.



Scriosfar Íola agus Fáithe Bréige

²“Ar an lá sin, a deir Tiarna na Slua, scriosfaidh mé ainmneacha na n-íol den tír agus ní chuimhneofar orthu a thuilleadh. Mar an gcéanna díbreoidh mé na fáithe agus gach claonadh chun na neamhghlaine as an tír. ³Agus má dhéanann aon duine tairngreacht ina dhiaidh sin, déarfaidh a athair agus an mháthair a ghabh ina broinn é leis: ‘Ní ceart thusa a fhágáil beo mar labhair tú bréaga in ainm an Tiarna.’ Agus tollfaidh a athair agus a mháthair féin é nuair a dhéanfaidh sé tairngreacht.

⁴“Ar an lá sin, beidh náire ar gach uile dhuine de na fáithe faoina chuid físeanna nuair a dhéanfaidh sé tairngreacht; agus ní chaithfidh siad clócaí róin níos mó d’fhonn daoine a mhealladh. ⁵Déarfaidh gach duine díobh: ‘Ní fáidh ar bith mise ach fear a shaothraíonn an talamh; óir, bhí talamh i mo sheilbh agam ó m’óige.’ ⁶Agus má fhiafraítear de: ‘Céard iad na créachtaí seo atá ar do chorp?’ freagróidh sé: ‘Is amhlaidh a fuair mé i dteach mo chairde iad.’”

An Claíomh: An tIarmhar

⁷“Múscail thú féin, a chlaíomh, in aghaidh m’aoire, in aghaidh an fhir atá i bpáirt liom,” a deir Tiarna na Slua.

“Buail an t-aoire chun go scaipfear an tréad!

Agus iompóidh mé mo lámh in aghaidh na n-uan beag.



- ⁸ Agus tarlóidh sé ar fud na tíre go léir,”
 a deir Tiarna na Slua,
 “go gciorrófar agus go ndísceofar
 dhá thrian den phobal,
 ach go bhfágfar aon trian amhain díobh ann.
- ⁹ Seolfaidh mé an trian seo tríd an tine;
 glanfaidh mé iad mar a ghlantar airgead;
 promhfaidh mé iad mar a phromhtar ór.
 Glaofaidh siad ar m’ainm
 agus tabharfaidh mé freagra orthu.
 Déarfaidh mé leo: ‘Is iad seo mo phobal’;
 agus déarfaidh siadsan: ‘Is é an Tiarna ar nDia.’”

An Cogadh Deiridh: An Tiarna, Rí na nUile

14 Féach! Tá lá an Tiarna ag teacht agus roinnfear istigh ionat an chreach a tógadh uait. ²Is amhlaidh a chruinneoidh mé na náisiúin uile le chéile in aghaidh Iarúsailéim chun cogadh a chur uirthi; gabhfar an chathair, creachfar na tithe; éigneofar na mná agus imeoidh leath na cathrach ar deoraíocht. Ach ní dhíothófar an leath eile de mhuintir na cathrach ar aon chor. ³Ansin tiocfaidh an Tiarna amach agus cuirfidh sé cogadh ar na náisiúin sin faoi mar a throideann sé ar lá catha. ⁴Ar an lá sin, beidh a chosa ina seasamh go daingean ar Chnoc na nOlóg, áit atá os comhair Iarúsailéim ar an taobh



thoir di. Scoiltfear Cnoc na nOlóg anoir siar ag gleann ábhalmhor, agus bogfaidh leath amháin den chnoc ó thuaidh, agus an leath eile ó dheas. ⁵Líonfar an gleann atá idir na cnocí ó Ghóa go dtí Iásól agus druidfear é faoi mar a tharla tar éis an chreatha talún in aimsir Uiziá, rí Iúdá. Tiocfaidh an Tiarna, mo Dhia, ansin agus a chuid naomh go léir in éineacht leis.

⁶Ar an lá sin, ní bheidh aon solas ann ar dtús, ach fuacht agus sioc. ⁷Ach lá ar leith a bheidh ann – mar is eol don Tiarna; óir, ní bheidh aon difríocht ann idir lá agus oíche, mar beidh solas ann san oíche.

⁸Ar an lá sin, sceithfidh uiscí beo amach as Iarúsailéim, leath amháin díobh i dtreo na farraige thoir agus an leath eile i dtreo na farraige thiar, ní amháin sa samhradh ach sa gheimhreadh chomh maith. ⁹Agus beidh an Tiarna ina rí ar an domhan go léir; ar an lá sin, ní aithneofar ach an Tiarna amháin mar Dhia agus ní bheidh aon ainm eile in airde ach a ainmsean. ¹⁰Déanfar machaire den dúiche go léir ó Gheaba go dtí Rimeon, áit atá laisteanas de Iarúsailéim. Ach fanfaidh Iarúsailéim ina hionad ar na harda agus beidh daoine ina gcónaí inti ó Gheata Bhiniáimin go dtí an áit ina raibh an seangheata, is é sin, go dtí Geata an Choirnéil, agus ó Thúr Hananael go dtí cantaoireacha fíona an rí. ¹¹Ní dhéanfar scrios uirthi níos mó agus beidh daoine ina gcónaí in Iarúsailéim faoi shíocháin. ¹²Ach maidir leis na ciníocha uile a bheidh tar éis cogadh a chur ar Iarúsailéim, is í seo an phlá lena mbuailfidh an Tiarna iad: lobhfaidh a gcuid feola orthu, fiú amháin agus iad ina seasamh ar a gcosa; morgfaidh a súile ina logaill agus dreofaídh a dteanga ina mbéal.

¹³Ar an lá sin, cuirfidh an Tiarna scaoll orthu. Béarfaidh gach duine greim láimhe ar a chomharsa agus ardóidh siad a lámha in aghaidh a chéile. ¹⁴Beidh Iúdá féin ag troid in



Iarúsailéim agus cruinneofar le chéile saibhreas náisiúin uile na comharsanachta: ór agus airgead agus éadaí, go flúirseach fairsing.¹⁵ Agus an phlá a bhuaifidh na capaill agus na miúileanna agus na camaill agus gach beithíoch eile sna campaí seo, beidh sí cosúil leis an bplá eile úd.

¹⁶Gach bliain tiocfaidh iarmhar na náisiún a rinne ionsaí ar Iarúsailéim chun an Tiarna, Rí na Slua, a adhradh agus chun féile na dTaibearnacal a cheiliúradh.¹⁷ Má bhíonn ceann ar bith de chlanna an domhain ann nach rachaidh suas go Iarúsailéim chun an Tiarna, Rí na Slua, a adhradh, ní thitfidh aon bháisteach orthu.¹⁸ Mura dtagann muintir na hÉigipte suas chun dul isteach inti, titfidh an phlá sin orthu lenar bhuail an Tiarna na náisiúin (nár tháinig suas chun féile na dTaibearnacal a cheiliúradh).¹⁹ Sin é an pionós a chuirfear ar an Éigipt agus ar na náisiúin go léir nach dtiocfaidh suas chun féile na dTaibearnacal a cheiliúradh.

²⁰Ar an lá sin, beidh “Coisriche don Tiarna” greanta ar chloig na gcapall; agus beidh na potaí cócaireachta atá i dTeampall an Tiarna ar aon chéim leis na babhlaí croite atá os comhair na haltóra.²¹ Thairis sin, beidh gach pota cócaireachta atá in Iarúsailéim agus in Iúdá coisriche do Thiarna na Slua. Na daoine go léir a ofrálann íobairtí, tiocfaidh siad agus tógfaidh siad iad le haghaidh na cócaireachta. Ansin ní bheidh aon trádálaí i dTeampall an Tiarna feasta.

